

所乞真君事跡加封如蒙朝廷許從太常寺
 申到事理候批今狀下部行下太常寺以憑
 加封施行伏候指揮後批并冊送禮部從勒
 官到事理施行本部尋連送太常寺遵從都
 省批狀指揮施行去後今據太常寺申本寺
 今遵從都省批狀指揮欲於應元保運字下
 加二字今欲擬
 九天採訪應元保運妙化真君合命詞給誥
 伏乞省部備申朝廷取旨加封施行申部本
 部所據太常寺申到事理備錄在前伏乞朝
 廷指揮施行伏候指揮四月八日奉聖旨依
 本部尋取到太常寺供到前銜後擬伏乞朝
 廷合詞給誥施行伏候指揮奉勅朕實事上
 帝懷柔百神矧惟仙品之高夙紀道書之祕
 三山鼎立雖摩跡於有唐一氣胚涵本儲靈
 於太始歲清並歸於主宰國家允賴於保綏
 迄今真風肆加美謚
 九天採訪應元保運真君體道為用入有出
 無象帝之先莫知誰子御炁之辨以遊無窮
 嘗受命於瓊霄來宅靈於廬阜惟九穹品秩

孰如採訪之尊會三界天人皆屬統臨之大
 自熙陵以太平興國而易觀額至
 神廟進應元保運仍揭官名昭回雲漢之光
 焜耀朱陵之府肆朕纘服率循舊章春秋黜
 祭之幸嚴水旱禱禳而必應閔羽衣之駢奏
 想鶴駕之馳遊用舉徽稱式彰妙化七千劫
 初分於元景未易殫名五百年流福於生靈
 適逢休會諒上蒼悔禍之有日而四海息兵
 之可期佑我丕圖永綏景福可特封
 九天採訪應元保運妙化真君

廬山太平興國宮採訪真君事實卷之二

廬山太平興國宮採訪真君事實卷之三
 宋崇奉類
 聖旨文字
 得旨為加封
 九天採訪應元保運妙化真君徽號仰管轄
 道士熊守中前往江州太平興國宮設醮一
 十二百分位五晝夜拜奏寶章并於壽聖廣
 福觀大中祥符觀各設醮一百二十分位降
 賜下項務在如法排列精加祈禱即賜感通
 仍賜御書並具收領回奏
 得旨宣諭安撫制置使尚書令江州太平
 興國宮管轄熊守中齋三清閣御書及香信
 等於本宮設醮并奉安誥命仰尚書代書青
 詞祝版御名及差屬官一員到官主香所有
 日分却令熊守中供報仍具已差官職位姓
 名前往回奏嘉熙四年閏十二月日協中大
 夫保康軍承宣使入內侍省副都知張延
 慶恭準
 真君祝版

維淳祐元年歲次辛丑二月己未朔初六日
甲子

皇帝恭謹遣太平興國宮管轄道士熊守中
謹以清酌庶羞之奠敬昭告于

九天採訪應元保運妙化真君品冠仙都道

高今古綏集生靈福流下土運數脩延實歸
宗主授之百神靈休為愈徽號聿崇斯為感
舉特伸慶讚德誠帝所用昭告於神聰敬一
酬于饗俎尚饗

設醮意旨

嗣天子臣某伏念縉緜丕圖期光前烈茂延
支本式固邦家眷茲福系之隆實精神功之
佑恭惟

九天採訪應元保運妙化真君天之貴神國
之主宰千萬載垂休於宗社五百年流福於
生靈茂著仙遊應元宜崇徽號謹備潔清之禮用
伸慶讚之忱謹取二月初六日就江州廬山
太平興國宮命闈官道士閉建祈穀福時齋
壇五晝夜節次拜奏寶章關祝周天星燈甲
子長生命燈滿散設醮一千二百分位延奉

上真導迎景貺伏冀神休密佑聖造潛扶寧
謐三邊安全萬宇咸睹清寧之象早開嗣續
之祥永錫和平更祈豐稔

上帝青詞

淳祐初元屬履壬春之吉太平真君冀蒙帝
社之私猥以菲涼紹茲休烈天知悔禍幸邊
備之甫紓民慮阻飢念邦儲之尚寤每軫憂
於丹悃丐垂貺於蒼穹爰命羽流肅延廳馭
乾演藥料之秘載修薄薦之虔伏願和氣薰
陶妖氛滌盪千祿百福之介燕翼有開一食
二貨之通魚麗允叶

真君青詞

應元保運扶世數之彌長著德立功為國朝
之尊仰由聖跡顯揚於廬阜而徽稱荐錫於
先朝茲循彝典之褒崇式表真風之妙化盍
奏闕於上帝庸慶讚於神休肅展頻繁上延
芝馭伏願垂九穹之妙造福降簡擇安四海
之生靈國祈奉定俾遷狼烽之息登膺能夢
之祥

壽聖廣福觀大中祥符觀醮意

維淳祐元年歲次辛丑二月己未朔十八日
丙子

嗣天子臣某仰惟

九天採訪應元保運妙化真君道品聿崇福
源浸衍為嶽瀆之主宰實國朝之貴神稔著
仙猷茂增徽號當醮儀報讚之後乃百神交
慶之初爰演沖科同歆盛事取今月十八日
就江州廬山壽聖廣福觀開建靈寶道場一
晝夜誦經行道關祝星燈滿散設醮醮一
百二十分位延奉上真仰祈景貺伏冀神休
叶蕃遂民安國泰之期邊鄙無虞觀天清地
寧之象

青詞

褒妙化之徽稱百神交慶對玄穹之上帝一
念潛孚非惟修緝典之昭明抑以顯靈休之
偉赫用嚴潔蠲之禮同伸讚慶之私伏願聖
造協扶共保丕圖於綿永邊陲寧謐俾躋黎
庶於昇平儲嗣流祥清寧開奉
本州乞降御香奏狀
臣厲文翁據江州廬山太平興國宮住持知

官兼管轄李守浩狀申照得本宮係採訪宅靈之地崇奉皇帝本命申福殿歲有春秋國醮係守臣代書御名詞表其旨曰俯為天下生靈禳災祈福祥符元年準勅歲降濕香下本宮諸殿堂供燒後來本宮不曾援例陳請竊惟福庭香火列聖崇奉嘉嘉禮降香建醮係國寧邦靈驗昭著勅文省劄非一而止昨蒙使府以瑞雪愆期持忱設醮隨獲感通十萬戶和氣遍覃五百年流福應識自祥符至嘉熙年內遇時降香建醮感應嘗奉聖旨加封真君妙化二字及頒降御書三清閣字仍賜度牒沉香腦子鎮壇繒綠等設醮保邊祈嗣詞意具存但前後降香建醮皆係使府保奏今來欲乞照例保奏朝廷舉行舊典所據前狀須至奏聞者

右臣照得太平興國宮係

九天採訪真君治所自唐開元至本朝已五百餘載神應非一褒典屢加國初以來給降御香歲有常比迨至隆興因循廢闕嘉熙二年及四年本官管轄熊守中申請遂蒙朝廷

加封真君妙化二字及降賜御香等自後本宮無人陳乞而本州亦不復與之奏申殊失累朝崇奉之意大為闕典近緣去臘瑞雪愆期臣躬詣祠下為民祈禱即獲感應如響斯答三白呈瑞豐年有兆即其靈驗所合申述彙章以昭神貺伏望聖慈特賜睿旨照國朝舊典每歲給降御香下本宮并照嘉熙庚子年頒降建醮指揮施行謹錄奏聞伏候勅旨
寶祐四年正月日

賜香省劄

昨準禮部符準寶祐四年二月八日都省批下知江州屬文翁狀奏乞舉行國朝舊典每歲給降御香下江州廬山太平興國宮建醮事後批送禮部契勘體例申尚書省準此本部所準都省批下上件事專連送太常寺契勘分明指定申部去後據太常寺申本寺今施照奏內稱乞照嘉熙庚子年頒降建醮指揮施行今指定欲乞省部備申朝廷下江州行下本官照嘉熙庚子年分頒降指揮體例徑自申請施行右連元送一宗申部乞備申

朝廷施行尋呈奉判備太常寺所申符本州徑自照元得指揮申請施行仍申省照會今本部具申朝廷照應外符州照應徑自照元得指揮申請施行所準前項指揮州司除已遵稟備報本官照應施行去後今據太平興國宮四申開具到本宮節次承準朝廷降香建醮等事月日體例事件申州乞備申省部檢照前例給降施行太平興國三年春秋二醮勅牒太平興國三年春秋二醮省燄齋料帳三縫紹興三十一年降香設醮祝版隆興二年降香設醮祝版端平三年廟堂奏旨設醮祈穀禳兵詞旨七縫并可漏嘉熙元年降香設醮保邊祈嗣玉蘭嘉熙二年降香設醮禳兵詞旨并錄兩會子綾羅單子等三縫肆件淳祐元年加封真君徽號詞旨祝版降香并祠牒錄兩綾羅聖旨文字肆縫伍件
右除已將前項文字申部乞辦驗發下本官照應外本州保明是實伏乞指揮給降施行伏候指揮照得知江州屬文翁申乞舉行國朝舊典給降御香下江州廬山太平興國宮

設醮事契勤先朝間曾降香及賜御書并降
度牒綾羅等今據住持知宮事李守浩乞檢
照元來已得指揮符本州徑自照例申青六
月九日三省同奉聖旨照舊例降香下江州
付本官設醮仍照嘉熙庚子給賜并下御樂

院內侍省學士院江州本官各照應右劄付
廬山太平興國宮寶祐四年陸月日

得旨宣諭制置屬侍郎江州太平興國宮八
月十五日修設國醮今賜去沉香三十兩箋

檀降真各一十斤充本宮醮筵供燒使用以
後祈禱別有降賜仍具收領回奏寶祐四年

七月日入內侍省東頭供奉官詹思殿祇
候幹辦龍圖天章等閣幹辦內藏庫翰林司

毛存恭準

奉安御香疏意

臣厲文翁情旨昨於領落之初因以禱雪而
應慨念真君儲福之地夙存國朝賜香之彝
宮門既有失於申明州郡復不為之啓請巫
膳奏續隨沐恩先恭準聖旨宣諭每歲賜太
平興國宮沉香三十兩箋檀降真各一十斤

充八月十五日秋祭醮筵供燒向後別行宣
賜以用祈天永命保國安邊傳及生靈同躋
仁壽今則已次琳宮預白丹悃伏望景曜下
臨監九重之忱悃名熏上賜修每歲之常儀
所集勝因以祈嘉貺

皇帝陛下恭頌鴻圖廣大燕翼綿長庶證時
而百穀成民皆樂業中國安而四夷服邊不
揚塵

初降御香建國醮別奏青詞

採訪宅靈金闕地隆於廬阜祈禳歲祀實薰
歲遺於禁庭屬州家之奏請愆期致聖代之
昇儀缺廢恭以

皇帝陛下衷心翼翼行善孜孜靈禱深宮恪
謹朝昏之禮日臨當守諄勤中外之憂體累
朝尊奉之心加妙化宸崇之號茲率修於常

典爰寓敬於辨香惟具存周覽乎九天之間
則明鑒宜乎於千位之上今首足患深於蜀
廣乃瘡痍痛及於淮襄水旱間關兵財匱乏
臣身叨闕寄世荷君恩望丹陛以輸忠即未
陵而請福伏願帝躬壽樂國本安強四序氣

調大有稻梁之慶三邊勢筆永無烽燧之虞
凡曰王民均蒙道蔭

恭奉朝廷賜錢設普度醮密劄

恭奉宣諭指揮去歲兵革以來忠亮死節戰
歿之士甚多流離橫天傷亡之民甚眾孤魂

無依實可與念當行普度使遂超生四川可
於重慶兩廣當就南嶽荆湖江西仍就江州

太平興國宮三處各修醮一千二百分每
處降賜沉香一百兩腦子十兩降真三百斤

黃蠟一百斤官會十萬貫真差人兵管押前
去逐一交割嚴潔排辦擇八月內啓達三晝

夜已劄四川制置司廣東經略安撫司廣西
經略安撫司湖南安撫司京湖制置司

景定元年六月日

昨者韃虜不道存食無厭所賴人可即戎每
戰必克或執干戈以衛或奪餐孤以登未嘗
臨敵以懷生皆欲滅此而後食竭忠思報視
死如歸殺氣干霄而欲腥英魂委露而逾壯
第念形軀之已殞痛于心替以難忘謹於八
月二十五日就江州太平興國宮修設普度

大醮一千二百分用憑道力俾遂超生

青詞

百戰間關見危致命一忠激烈雖死猶生惟
勇士不忘表元故敵人每為奪氣連念胡敵
之甚惡遂令國步之多艱不貳爾心豈與共
戴天而處勉出乃力蓋將實亡地而存義重
而形軀則輕後同而瞬息即異與言鉅痛深
愴至懷帶劍之辭尚新忍忘楚野復矢之衣
曷挽空慨邇婁度修薦拔之科庸寫盡傷之
極伏望大垂慈鑒俯掣冥途壯節難磨已可
垂名於穹壤英魂未逝尚能效後於風靈。

史大資申述靈驗乞加封尊冊事

本州太平興國宮崇奉

九天採訪應元保運妙化真君香火考諸圖
誌實唐開元間明皇感夢真靈欲就廬山建
祠後五百年福及生靈於是勅江州建九天
使者廟本朝列聖尤極欽崇太宗改賜觀額
神宗進號應元保運真君徽宗奉上玉冊易
觀為官高孝兩朝皆常遣官致禱保邊糧兵
皇上踐祚以來賜奎畫降御香尊奉尤謹

之自去秋祗成適值胡馬透渡彼旨遣黃接
鄂岳之聞命即行但副閫事權素輕江州又
號內地進當大敵則無將無兵退守中流則
城卑壕淺舟師援鄂則風逆莫前增戍保黃
則星流告變人心皇皇士氣不振事關宗社
未知攸濟遂望真祠許設普天大醮三千六
百分保國禳兵由是天乃返風遣援無虞靈
貺昭昭敢忘報謝之遂躬詣本宮酬還醮
願遍讀碑刻始知真靈一號朱陵上帝採訪
九天九地較定天人祿壽生靈禍福其尊與
天帝比又主九宮九州九星分野陽九百六
之數實與世運關係興衰而本朝蒙福為多
建炎逆賊張遇攻犯江州城中軍民親見真
相現於雲端結成龍馬賊遂殞滅開禧兵曠
叛蜀夔帥蔣介有神降筆謂採訪已奏於上

帝行被族誅今茲狂虜犯順實賴陰相江面
再清東南莫執統數今日至于開元率未正
應五百年後靈響昭彰如此但君之竊念神
考進應元保運之號係降詔旨及徽廟追繼
先志鑲之玉冊以至列聖青詞皆以皇帝臣

甚冠之嘉熙年間加封妙化二字太常一時
失於檢會止令命詞給詔與元豐政和典禮
舛異恐未稱明時昭事之意謹錄元豐政和
詔冊繳連在前欲望公朝特加敷奏付有司
討論典故於應元保運妙化今號之上加上
八字徽號專以冊書鑲以嘉玉收回元詔赴
禮部架閣不惟消弭兵災肇開泰運保國祚
於有永延聖壽以無疆抑與列聖尊崇典禮
不至背馳豈勝宗社生靈之幸

景定元年五月日

陸殿撰再奏乞頒降封冊事

臣景思照得本州太平興國宮

九天採訪應元保運妙化真君考之圖誌自
唐開元見夢著靈有五百年後福及生靈之
證奉之碑刻一號朱陵上帝採訪九天九地
主九宮九州星野陽九百六之數按之祀典
本朝自太宗賜今觀額神宗降詔進號應元
保運真君徽宗奉上玉冊易觀為官高孝兩
朝皆嘗遣官致禱邊事皇帝臨御以來加封
妙化二字頒降三清閣御書降香設醮朱表

青詞所以欽奉者至隆質之靈驗建炎張遇
 犯城有現雲滅賊之應開禧具職叛蜀有降
 筆誅克之報今年虜哨入本州瑞昌縣境若
 有所制訖不能前陰護一方全活甚眾致如
 甘雨時雪消疫濟業保邊疆兵護國救民其
 所以孚佑者甚盛臣景憲維今泰運方回熙
 典備舉方秩無文而歲祀必致崇極於大神
 矧採訪高真流禍窳極自開元辛未至于今
 式應五百年後雖運化無名何心隱顯而進
 號備冊異眾欽崇兩朝詔冊以天神禮之列
 聖表詞以皇帝巨寇之嘉熙加封禮寺不及
 檢會止令行詞給誥未稱舊典御香既降國
 醮有嚴歲用春秋帥臣奉辭以告崇報未極
 衆心歎焉欲望聖慈降付尚書省於應元保
 運妙化真君今號上加八字徽稱仍乞檢會
 前知郡資政史若之所申繳錄元豐政和詔
 冊付有司稽典故尊之冊書鏤之嘉玉千以
 稱累朝昭事之心予以近九天丕錫之釐須
 至奏聞者

景定元年九月日

印徽猷申乞加封冊號事
 應雷被命假守祭山川之在境內者蒐祠典
 詢故老伏聞

九天採訪真君感夢明皇建祠是邦正直而
 一敷佑下民學五百年紹興現雲張遇隨滅
 閉禧降筆具職伏誅虜哨江瑛郡嬰孤城以
 自固一至近境避易驚遁此其近事之彰灼
 也夷考我朝列聖崇褒精忱備至神功施及
 于今名號未加其舊或者其不謂禮前守臣
 史資政陸殿撰俱嘗敷奏乞頒徽號以副興
 情未準回降當今泰運方開地彌天區百神
 受職靈績既昭表章可後欲望公朝檢會詳
 酌

景定二年五月日

江州備坐省劄

江西安撫知江州今月初五日準通到行在
 尚書禮部符進景定二年八月初四日都省
 批下太常寺申準都省批下朝散郎新除直
 徽猷閣知江州印應雷申照對昨到郡之初
 本州士民合詞有請皆曰前歲韃虜偷渡路

透江西一境獲安皆

九天採訪應元保運妙化真君有桐廬山垂
 福乞為申明增加徽號又有前政史大資陸
 殿撰兩嘗奏聞謹備元奏重行申述欲望公
 朝檢會累申特賜敷奏六字上加兩字仍檢
 會政和舊典頒降玉冊申聞事奉鈞判送太
 常寺契勘申本寺照得景定元年六月內準
 都省批下江州中乞與本州太平興國宮崇
 奉

九天採訪應元保運妙化真君加上八字徽
 稱事本寺於當月擬封
 九天採訪應元保運妙化助順真君專以玉
 冊合遵照元降指揮今且命詞給誥除已於
 當年六月內具申都省外謹具申尚書省伏
 乞指揮照本寺已申事理施行本州證會施
 行後批送禮部行下本州照應施行準此須
 至符下符州仰詳者符內遵從備坐批狀指
 揮事理施行所準指揮具呈餘廳官書擬欲
 帖太平官照會奉台判帖須至行遣

景定二年十一月十八日

加封詰勅

至道之精窈冥無迹超乎萬物之表行乎九天之間名位崇而功化妙命之曰真而已江州太平興國官

九天採訪應元保運妙化真君仲澹而與造物遊變化而與陰陽運吉凶悔吝存乎人皆出於寂通感應之理天憤不道之虜廼能相王師清江面採訪為名若有物司乎其間不知真君之不物於物而物有不能適之者封極於真君號極於八字尊之至矣可特封

九州採訪應元保運妙化助順真君

本州奉安封詰醮慶意旨
歲在己未戎馬寇江審依採訪之靈克相王師之捷犬羊掃迹鴻鴈真居允藉陰功宜崇報典足真封於八字惠徵福於九江鳳詔誕頒琳宮改觀臣叨承藩牧躬致綸恩幸依助順之休爰奉安慶之禮永扶國梓垂祐邦圻

慶醮詞

有赫厥靈克助王師之順揭虔以吉用昭國典之華雖真馭母假於褒揚在朝廷合隆於

酬報緬惟叢殿倏落屬階江漢浮浮驚濤揚鞭之馬疆場翼翼蘇酒盞之魚露佐威聲獲全生聚錫徽章於八字答景貺於九天與國同休蕩妖氛於邊壤思皇多祐增瑞色於山川

廬山太平興國宮採訪真君事實卷之三

正一天師清微弟子 洪百堅 道教學術資訊網

廬山太平興國宮採訪真君事實卷之四

元朝崇奉類

聖旨文字

長生天氣力東大福騰護助裏皇帝聖旨城子裏村子裏達魯花赤官人每根底來往行路底使臣每管軍的官人每出軍底人每衆先生每百姓每根底宣諭的聖旨成吉思皇帝哈罕皇帝聖旨裏和尚也里可溫先生達失蠻不棟甚麼差發休者告天與俺每祝願者道的有來如今依著已先聖旨體例裏和尚也里可溫先生達失蠻不棟甚麼差發休者依著太上老君教法裏告天與俺每祝願者麼道這信州龍虎山上清正一宮住持張天師根底執把著行的聖旨與了也更有天師本戶演法觀為頭諸官觀裏房舍裏復臣每休下者不棟是誰休倚氣力住坐者官觀裏休斷公事者倉糧休頓者不棟甚麼休頓故者鋪馬祗應休者商稅休與者但屬官觀底田地水土竹木碾磨船隻園林解典庫店浴室鋪席酒醋不棟甚麼差發休要者